

In amal hual quijcuiluc in lanahuatini San Judas

Judas quinmijcuilulíá yehuanten hual Dios quinnotzac pa yesi ilacames

¹Nehual Judas itequipanujquil Jesucristo huan icni Jacobo, annimitzjcuilulijtica amhuanten hual Dios toTajtzin anmitznotzac. Amhuanten anmitzlajtultic toTajtzin pa anyes iyaxca. Yihual anmitzanac huan anmitzpixtica pa Jesucristo. ²Ma Dios anmitzmaca míac ilaicnililislí huan míac imosehuilislí pa anmoyolo huan míac ilasojlalisli.

Quijtúa pampa cate yehuanten hual quimaxtilo islacatilisli

(2 Pedro 2:1-17)

³Lasojli nocnían, nicnequiaya míac annimitzjcuilulí pa annimitzmaxtilisquiaya in hual timoxtin ticneltocalo, nicnequi niqijjtúa, in quinami Jesucristo techquixtic pa ipolehuilislí tolajlaculisli. Ma yoje, niqitac pampa monequi míac pa annimitzilis pa anquinapatis Dios ilamaxtilislí hual ticneltocalo. Dios quimacac in lamaxtilislí jan sejpa san pa camo mochahuas pa cayas ca tehuanten hual yihual techlajtultic pa tiyesi ixolomes. ⁴Quema, xicnapatican Dios ilamaxtilislí, pampa cate sequin lamaxtinijmes hual nesije capa

amhuanten. Pa yina Dios quimatic pampa hualalosquiaya yehuanten. Techcahuilic ilajtol lajcuilulí hual quijjtúa pampa Dios quilalic pa yesi latojtocali pa in lacocottilislí hual yahui quinpanúa yehuanten hual amo quineltoocalo. Quema, yehuanten amo quimatilo momajtilo ilaixpan Dios, huan islacatilo. Quijtulo Dios tejchihuilic cuali huan pampa in, quil, huil ticchihualo len yes ticnequilo ticchihualo ca tocuerpo. Quema, quijtulo pampa huil ticchihualo mochi laijlaculisli. Yoje, ca inminlamaxtilislí, yehuanten quimaxtilo pampa amo unca neli in hual Dios quijjtúa quinami unca Jesucristo. Quimaxtilo pampa amo unca neli pampa jan Jesucristo san unca toTeco huan toTata.

⁵Axan, nicnequi annimitzjnamiquiltía inon, mas que ancataya lamachiltili pa anquimatis mochi inon. Nicnequi pa camo anmochahuas pa anquijnamiquis. Annimitzjnamiquiltía pampa quiman toTata quinquixtic totajtzitzián pin polehuilislí nepa pin lali Egipto, cuaquín quinmictic yehuanten hual amo quineltoocanijme. ⁶Noje annimitzjnamiquiltía in hual quinchihuilic ilanahuatinijmes pin cielo. Sequin pehuaje quitocaje oc se lajtulisli pa in hual Dios quilalic pa quinhueliltis. Quinequiloaya len hual

amo inminyaxca. Yoje, quicajcahuaje inminchan pin cielo (ilhuicac). Axan Dios quinpía latzacuali, amo quiman quinmacahuas, mocahuasi pan laticumac, quichixticate pa quiman ajsis in hué tonali hual Dios quinmixcomacas ca in amo cuali hual quichihualoaya. Cuaquín quintojtocas pa yajmo cayasi iyampa. ⁷Noje nicnequi annimitziznamiquiltía quinami quixitinic in caltilan Sodoma huan in caltilan Gomorra huan in oc sequin caltilan itejtenco. Yehuanten pa innojen caltilan catanijme yojque quinami in lanahuatinijmes amo cuajcuali pin cielo, monilunijme ca lacames huan sihuames, se ca mías oc sequin. Noje yehuanten amo quiman mocahuaniijme pa monilusi quinami Dios techilic pa camo quiman quichihuasi lacames. Yehuanten cate lanextilisli pa tehuanten, pa camo tiyulisi yoje. Dios quinlamic innojen caltilan ca tixuxli huan noje quinlamic in lacames hual nepa chantinijme.

⁸Huan innojen lamaxtinijmes amo cuajcuali hual cate capa amhuanten ma yoje quichihualo quinami in lacames hual chantinijme pa innojen caltilan. Quichihualo noje quinami in lanahuatinijmes ej'elehuis nepa pin cielo. In lamaxtinijmes lajtemiquilo huan quiman ejsalo, quijtulo Dios quinmilic pan ipampa in lajtemiquilisli pampa unca cuali quichihualo in amo cuali. Quijtulo pan ipampa in lajtemiquilisli Dios quinmilic pampa quinmacahuiltía pa quichihuasi ca inmincuerpo len Dios techilía pa camo quiman ticchihuasi. Noje quijtulo pan ipampa in lajtemiquilisli Dios quinmilic pampa quinmacahuiltía pa camo quineltocasi ilahueliltilisli aqui yes huelitijtica. Huan quijtulo pan ipampa in lajtemiquilisli unca inminyaxca quinhuejuecaltisi moxtin hual cate huejué. ⁹Ma yoje, ma annimitzili in

hual quilic Miguel. Yihual ilaicanani moxtin ilanahuatinijmes Dios hual cate pin cielo. Se tonali huan in lili molaxilijtataloaya lajtomes pa quimatisi aqui cataya iyaxca pa quihuicas imijquil Moisés. Huan Miguel quimatiaya momajti ilaixpan in lili huan pampa in momajtic Miguel pa quixcomacas in lili ca lahuejuecaltilisli pampa lajtuaya elehuis. Jan quilic, quil: "Ma mitzajua in Tata." ¹⁰Ma yoje, amo cate quinami Miguel innojen lamaxtinijmes ej'elehuis, pampa yehuanten quihuejuecaltilo len yes hual amo quiximatilo. Huan ca inmincuerpos yehuanten quichihualo quinami quichihualo in yulijquimes, in yulijquimes hual amo quimatilo laijnamiquilo. Huan yojque moijlaculo yehuanten hual cate quinami innojen lamaxtinijmes ej'elehuis.

¹¹¡Ah, yehuanten, quinami yalo panulo lacocoltilisli! pampa yulilo quinami Caín, canaje iojli. Noje cate quinami Balaam. Yihual quinnextilic Dios ilacames pa quichihuasi len amo cuali, huan oc se lalac quilaxlajtataya Balaam pa quinchihuilis inon. Huan innojen lamaxtinijmes ej'elehuis noje cate quinami Coré hual quixcomacac Moisés huan Aarón, mochíac inminlacocolini. Quinhuejuecaltic, huan pampa in, miquic huan noje miquije moxtin hual quitocaje. ¹²Quema, innojen lamaxtinijmes amo cuajcuali anmitztlalilo pan polehuilisli. Cate quinami tetilan itzindan in al huejcalan hual amo moitililo. Motecualo in barcos ca innojen tixcalimes, moxtinilo. Huan nepa ca amhuanten cate in lamaxtinijmes ej'elehuis quiman anlacuajtica pa anquimolancuacuetzilis toTajtzin. Amo momajtulo ilaixpan Dios. Lacualo huan launilo mías, quitemujticate quinami canaló mías pa yehuanten san. Amo anmitztpalehuilo nindeno. Yehuanten

cate quinami mextemimes hual amo temacalo quiahuil, san quinhuicatía in ijyecal. Cate quinami cuahuimes hual amo quipialo ilaquilyo. Noje huaquije pampa cate quinami lacapunali, yajmo quiman laquilo. Mas que unca in mesli pa quipialo ilaquilyo, amo quipialo. Innojen cuahuimes cate quinami miquije sejpa huan oc sejpa. Miquije pampa amo quipialo ilaquilyo huan noje miquije pampa cate quinami lacapunali. Amo quiman ajsisi oc sejpa pa in tonali quiman quimacalo laquilyo. Huan yojque mocahuasi innojen lamaxtinijmes. Miquije pa inminyolo pampa amo quiman quineltocaje Dios, huan in tonali hual miquilo inmincuerpos, cuaquinon moxilulo capa unca Dios huan amo quiman huil mocuepasi. ¹³Quema, yehuanten lamaxtinijmes cate quinami in al huejcalan quiman majcoctica. Amo mosehuía, quiquixtítica posunquil hual unca yojque quinami inminlachihualisli huan inminlajtomes inminlamaxtilisli hual quisalo pa inmincamac in lamaxtinijmes ej'elehuis. Mochi inon hual quichihual amo pinahualisli niman elehuis. Quema, innojen lamaxtinijmes cate quinami luceros (silalimes) hual amo cate san sejpa, amo mocahualo pa mopalasi capa cate pin cielo (ilhuicac). Huan in luceros mopolusi huan yajmo quiman moítasi. Cayasi capa laticumactía niman m'ac. Yoje quinami in luceros, innojen lamaxtinijmes ej'elehuis amo mocahuasi pa cayasi capa niman laticumac, capa amo quiman quisasi. Ca ompic Dios quintilanis.

¹⁴Adán quiplaya ixohuiyo hual quiplaya ixohuiyo hual motocani Enoc. Huan in Enoc yec Dios ilajtuni huan quijtuc in hual yahuiaya quinpanu innojen lamaxtinijmes amo cuaqcuali, quijtuc, quil: "Xiquitacan.

Quinlajultic in Tata miles huan miles hual yihual quinmochipahuilic huan quinlajultic pa yesi iyaxca pa quitequipanuilisli yihual san. NiQuitac hualac ca yehuanten. ¹⁵Hualaje pa quinpolehuiltisi huan pa quintilanisi capa yesi lacocoltili moxtin yehuanten ej'elehuis, moxtin hual amo momajtilo ilaixpan Dios. Quinmixcomacaje ca mochi inminlachihualisli hual lanextililo quinami amo quimatilo momajtilo ilaixpan Dios. Noje in Tata huan yehuanten hual iyaxca quinmilije pampa quichihuaje laijlaculisli pan mochi in m'ac tonalijmes quiman quicocolije Dios ca lajtomos chijchicahuac." ¹⁶Quijtuyaya Enoc inon pa yehuanten hual amo mocahualo pa quixtocasi in hual elehuis. Mojmosta quijtulo laijtic inminyolo pampa amo quixtocalo quinami Dios huelitía. Yultialo quinecticate quichihualo o quipialo len amo unca cuali. Amo mocahualo pa quixtocasi laquetzasi ca lajtomos chijchicahuac quicocolijticcate mochi hual Dios quichía. Quinlaquetzililo cuali ca oc sequin quinmilijticcate in hual quinpaquiltis. Huan quichihualo inon san pa yehuanten quinchihuilisi in hual quinequilo innojen lamaxtinijmes ej'elehuis. O quichihualo pa yoje innojen lamaxtinijmes huil quinquixtilisli len yes quinequilo.

¹⁷Ma yoje, amhuanten, lasojli nocnían, amo ximocahuacan pa anquijnamiquis quinami pa yina laquetzaloaya ilanahuatinijmes toTata Jesucristo, quijtuloaya in hual yahuiaya panu. ¹⁸Anmitzililoaya: Ajsisi tonalijmes quiman yahui lami in lalticpan hual tiquiximatilo. Cuaquín cayasi lacames hual quihuitzquilisli mochi hual quilía Dios. Mojmosta yultiasi quichijticcate mochi tetzcuinuc hual quinequilo quichihualo, amo momajtiticate

ilaixpan Dios. ¹⁹Cate yehuanten innojen lamaxtinijmes ej'elehuis hual quijtulo inminlamaxtilisli unca cuali, huan quijtulo pampa in, yehuanten cuali. Huan oc sequin hual quineltocalo Jesucristo amo ajsilo cayalo cuali quinami yehuanten, quil. Ma yoje, lacuajcuamanticate, yojque anmitzjcuaniilo capa cate in oc sequin laneltocanijmes. Quijtulo, quil, jan yehuanten san yulilo quichijtcate quinami Dios quinequi. Quijtulo, quil, moxtin in oc sequin laneltocanijmes yulticate quinami yulilo yehuanten pin lalticpan hual amo quimatilo Dios ilajtol. Huan neli cate yehuanten in lamaxtinijmes ej'elehuis hual yulilo quinami yehuanten pin lalticpan, pampa noje quinami yehuanten, amo quipialo Dios iEspíritu.

²⁰Ma yoje, amhuanten, lasojli nocnían, ximochicahualtican quinami anquineltoatica Jesucristo. Unca Dios hual anmitzmaca anmolaneltoalisli. Mochi ilajtomes cate melahuac, amo unca oc se laneltocalisli, jan inon san hual Dios quimaca. Huan xiclañlanican Dios anquimacahuiltitica pa anmitzpalehuis in Espíritu Santo. ²¹Ximopixtiacan huan xiquijnamiqican mochi tonali quinami Dios anmitzlasojla. Xiyultiacan anquichixtica toTata Jesucristo ilaicnililislisli pa quiman hualas oc sejpa huan techuicas capa ticayasi ca toyulilislisli hual amo quiman lamis.

²²Ximotolinican pa anquinsulahuas yehuanten hual momahuilijtcate pampa quinmaxtije in lamaxtilisli

amo cuali innojen lamaxtinijmes ej'elehuis, xiquinsulahuacan pa camo quineltocatiyasi. ²³Xiquinquixtican pin polehuilislisli yehuanten hual pehuaje quineltocaje in lamaxtilisli elehuis. Xiquinquixtican quinami anquinoxititiquisasquiaya se pin tixuxli pa camo miquis lachichinuli. Quema, xiquinmicnilican, huan amhuanten ximomajtican pa camo anmitzjylacus in lamaxtilisli elehuis hual quinchihuilic yehuanten pa quichihuasi laijlaculisli. Xijcocolican inminlajlaculisli, xiquitacan quinami cataya se tzotzomajli pucmic hual anmitzjyaltía. Quema, xiquiztiacan yoje pa camo anmoaniltis ca inminlajlaculisli.

Lami ca lajtomes huejué pa Dios

²⁴Axcán, ma tiqulican lajtomes huejué yihual hual huil techpías pa camo tihuetzisi pan iojli. Huil techuicas pa timoquetzasi iyampa yihual tiquiztcate ilaixpelalisli niman cualtichin huan ichicahualisli hué. Tiquitasi amo ticpixtcate laijlaculisli nindeno. Huan tiquitasi ticpixtcate niman m'ac paquilisli. ²⁵Quema, pa yihual in Dios hual unca se san, hual techquixtic pin polehuilislisli pan ipampa toTata Jesucristo, ma quipía mochi laixpelalisli niman cualtichin. Ma techcaqui tiquilijtcate lajtomes huejué. Ma caya pa yihual chichahualisli hué huan lahueliltislisli. Ma quipía mochi innojen quiman pehuaya mochi huan axcán huan pa mochi tonalijmes hual ajsitihualasi. Yoje ma ye.